

奉
天
古
蹟
考

殿志 903

地 750.41

11.91

部 =



東廬先生古君子人也好學深思從政之餘時有新著東廬叢刻二十餘種志傳而外多經世家言近輯奉天古蹟考聞見足徵考古之勤 先生以名進士官東省治民理財政績稱吳公第一尙志節尤崇理學忠信篤敬雖蠻貊可行生平無聲色之好克已行仁聞過則喜識者稱其進德之猛今春應內務部之聘採取經史分忠孝節義四綱集爲務本篇上之內務教育兩部當議通飭中外宣講傳觀其有益於人心世道者可知奉天古蹟考雖不過隨筆雜記而其中如以通志人物不載伯夷叔齊爲無識獎守陵之老人辨薩滿之非宗教卓識精言獨見其巨詎尋常鈔竊成篇者所能同日語耶權不敏從遊門下逾十年 先生每有著述常以得增一言爲榮幸今遠別赴湘而此考適成又安可不妄贅數言以告讀者 乙卯冬門下梁申權識

奉天古蹟攷

滿洲金 梁息侯



瀋陽舊稱盛京周圍九里街道爲井字形左鐘樓右鼓樓而宮殿位於中央八門正戴方隅截然今撫近門石額刊有大金國天聰五年字樣按通志崇德元年丙子四月乙酉建國大清改元崇德然則崇德以前國號大金耶

盛京故宮建於崇德二年正門曰大清左爲文德坊右爲武功坊俗稱東西華門正殿曰崇政殿原名篤恭殿左爲飛龍閣上藏御用弓矢等類下藏古銅鼎彝閣後有樓七楹陳列磁器右爲翔鳳閣上藏書畫等類下藏御用珍寶今均移送北京閣後亦有樓尙留存滿漢文書籍不少殿北曰鳳凰樓三層上藏列代御容及行樂圖中藏御寶十方樓左爲師善齋日華樓右爲協中齋霞綺樓正北曰清寧宮爲祀神之所宮後左曰衍慶宮關雎宮右曰永福宮麟趾宮頤和殿在崇政殿之東殿後爲介祉宮宮後爲敬典閣今藏玉牒廡光殿在崇政殿之西殿後爲保極宮宮後爲繼思齋齋後爲崇謨閣實錄聖訓滿洲老檔

奉天古蹟攷

奉天作新印刷局排印

均藏於此大內宮殿規模不大而氣象頗整肅近則門禁已弛行人皆可越東西華門而過已非復當年尊嚴之象矣

文淵閣在大內之西舊藏四庫全書及圖書集成與文淵文源文津三閣同時頒發裝繕甚精每夏六月曝書一次數百年發之如新今與故宮珍藏同移北京唯珍藏已陳列武英殿供人觀覽而此書未見不知現存何處也

故宮舊有珍藏頗富首推古銅都八百件西清續鑑詳載圖說其次瓷器凡十萬餘件皆宋明及康熙乾隆時物其次書畫約可千件梁曾編有故宮書畫記其次圖書卽文淵閣所藏各殿亦多古籍而戰用遺念各品甲冑弧矢均足爲一朝興廢之紀念錫清弼制軍督東時余兼司典守之職曾議創立博覽館繪圖訂章奏明建設會制軍告歸而余亦出守新民事遂中輟今已移送京師凡武英殿所陳列者半爲盛京故宮之物也

大政殿爲太宗御以聽政之殿在大內東殿制八隅左右列署十爲諸王大臣議政之所前有小亭供一斷石俗稱十面石十面均刊佛號隱約猶辨大唐字樣當是唐時寺塔殘石

也

太廟初在撫近門外殿中設寶位及床榻衾枕禱祿帷幔如生事儀乾隆年移建於大清門之東并奉旨太廟尊藏冊寶應選和闐白玉另鑿一律以彰符命梁曾照式模錄合共十六分今冊寶仍藏於此

鳳凰樓所藏御寶相傳卽太宗得元傳國璽按通志初察哈爾宰桑等來歸其子額哲尙奉所遣人衆留託哩圖太宗命貝勒多爾克等招撫之遂降并於額哲母妃處得元傳國璽其文乃漢篆制誥之寶四字二交龍爲紐自元順帝携入沙漠後失去越二百餘年有牧羊山麓者見羊不食草但以蹄掘地發之得璽以歸元裔博碩克圖汗後爲林丹汗所得天聰十年諸貝勒携歸以獻太宗受之始稱尊并建國號以是年爲崇德元年

堂子在城東內治門外爲祀天神之所并立神杆按時致祭舊俗各家亦立神杆於庭日置米穀謂供神鵠按滿洲神杆之祭其來甚遠後漢書三韓諸國邑立蘇塗建大木以事天神與立杆祭祀之儀正合又滿語稱神杆爲索摩與蘇塗音亦相近神鵠之說蓋訛傳耳

奉天古蹟攷

二

奉天作新印刷局排印

天壇在德盛門南五里建圓丘舊制三成每成圓面遞加環砌上成九重周圍一丈八尺二成七重周圍三丈六尺三成五重周圍五丈四尺俱高三尺地壇在內治門東三里建方澤舊制二成四周以方坎蓄水每層方面遞加漫砌上成建方六丈高六尺下方八丈高二尺四寸今猶存

三陵一曰福陵亦曰東陵爲太祖陵在盛京城東北二十里之天柱山渾河環於前輝山時於後葱鬱鬱爲諸山冠一曰昭陵亦曰北陵爲太宗陵在盛京城西北十里之隆業山遼水右廻渾河左遶地勢宏敞築土爲陵一曰永陵爲肇興景顯四祖陵在興京城西北十里之啓運山自長白山西麓一幹綿亘層折至此重巒環拱形勢特佳

東陵多松北陵秋多紅葉永陵寶頂上有瑞榆一株輪囷盤鬱圓覆數畝觀者稱奇乾隆御書神樹賦勒石殿前

東陵御碑石高三丈前刻神功聖德碑後面石紋隱約現人形天陰尤顯宛然美人俗稱美人石亦稱觀音石取其形似也

北陵前立仗石馬相傳一名大白一名小白蓋太宗坐騎之像也太宗體豐而鏡重乘小白日行百里乘大白祇能行五十里云

陵山舊制設紅椿爲界禁樵墓乾隆四十三年高宗謁福陵命大臣閱視於附近地方查出墳塚數處俱令給費遷葬並於紅椿外增設白椿白椿外設青椿界外方許樵採耕牧及行走葬厝三陵制畧同

陵祭典禮極重舊設禮部專司其事今由三陵守護大臣按時致祭舊制並重謁陵之禮凡大員到任或過境者皆應先謁陵方許視事

庚子日俄之戰俄兵佔東陵方羣謀焚毀守護陵官皆避匿不敢近有老人名福祿康阿者年已七十餘矣鬚髮皓然子身獨出涕泣以爭不則誓入火自焚俄官感其忠義幸而保全事後竟無議及者庚戌年梁隨錫制軍謁陵老人猶健在特約來前制軍獎飾備至梁復酌大杯跪而敬之老人爲之莞然（以上宮殿山陵）

奉天舊有三京一曰盛京卽今之瀋陽本古挾婁國地遼金爲瀋州治元爲瀋陽路總管府

奉天古蹟攷

三

奉天作新印刷局排印

治明爲瀋陽衛清更名曰盛京設奉天府承德縣今仍稱瀋陽縣卽省治也一曰興京在今興京縣南四十里明置建州衛於此爲清太祖創業之地原名赫圖阿拉滿語橫甸也天志聰八年更名曰興京一曰東京在遼陽城東八里太子河邊天命六年建今廢按通太祖始都興京遷東京天命十年復遷盛京三京之名唯東京係承遼金之舊興京盛京皆後改者也

瀋陽縣亦稱古樂郊按遼太祖俘三河之民至此建三河縣後更名樂郊其地在今城之東北隅近三六橋都護關園東署未定名余謂何妨卽曰樂郊詩云逝將去汝適彼樂郊樂郊樂郊誰之永號管寧避地東海庶幾有同情歟

舊傳瀋水十景已無攷今傳八景一曰鳳樓曉日登鳳凰樓而一覽曠曠曉日烟火萬家二曰星閣晴霞奎閣高峙城東夕照晚霞一望千里三曰北陵紅葉北陵多楓柳西風黃葉紅滿秋林四曰天柱神松東陵天柱山萬松夾道歲寒不凋五曰四平燈市城內四平街上元放燈春城不夜六曰萬泉蓮舟萬泉河荷花滿沼畫舫如織採蓮而歌七曰西園

晚眺公園在西邊門外夏夜納涼遊客羣集八日東塔春畊東塔農事試驗場綠野春畊
別饒風景

將軍公署在德盛門內卽今之將軍府庭有古槐爲百年舊物張今頗將軍曾題詩於樹有
庭前古樹老於我天外斜陽紅上樓之句拓以贈人梁亦得其一紙焉

北豐城在瀋陽城西北後漢末公孫度據遼東置城於此謂之豐城司馬懿伐遼東豐人南
徙青齊其留者曰北豐今城圯無存

奉集堡卽遼之奉集縣在瀋陽城東南四十五里有土城周圍四里熊廷弼經略遼東此爲
重鎮

永安橋俗名大石橋在瀋陽城西三十里瀋河經其下清崇德六年建初太祖定都瀋陽以
西路道途沮洳命修疊道百二十里太宗復建此橋以便行旅至今賴之

撫順城舊爲撫西城明設千戶所亦曰撫順關按通志明神宗十六年清太祖始於撫順清
河發陽寬甸四關口互市又天命三年太祖率兵征明破撫順毀其城征明兵自此始

奉天古蹟攷

奉天作新印刷局排印

遼陽之名最古本漢縣名屬遼東郡魏晉治襄平後入高句麗國唐爲安東都護府治遼金
爲東京元爲遼陽路明爲遼東都司城因元遺址修築清太祖建都於此後改遼陽州今
又改爲縣

遼金宮殿在今遼陽縣城東北東丹王宮內有讓國皇帝御容殿及大東丹國新建南京碑
銘今無可攷

南北市在遼陽城內按遼史於都城分南北市中爲看樓朝集南市夕集北市今街西有金
德寺鐵旛竿猶在焉

高麗城在遼陽城東南隅相傳高麗據遼東時建俗稱高麗營卽明設遼中衛處
鶴野故縣在今遼陽城西八十里本漢居就縣地唐時渤海置鷄山縣遼改鶴野以丁令威
化鶴名也

遼海亭在遼陽城內金高士談詩云殘雪樓臺山向背夕陽城郭水西東未云白嘆不如華
表鶴故山猶在白雲中今故址無攷

華表柱在遼陽城內舊有石柱相傳爲丁令威化鶴所集又城東六十里有華表山亦以丁令威得名

釣魚臺在遼陽南三十里相傳爲渤海遊觀之處

景遷堂在遼陽城內元權府事洪革建革有志於學慕慈母三遷之教故名

蝸臺在遼陽城東北明一統志金大定中修城夫役毀臺取土得石函啓之中有塊石圓滑天成搖撼作聲破之二大蝸尾稍相鈎見風卽死今臺址無存

遼陽八景一曰華表仙莊卽華表柱二曰龍王神渡相傳太子河岸龍王廟前夜見老翁操舟渡人貌與龍神相似三曰神燈孤照城內西街昔時夜有明燈或一或二隱現不常四曰白塔晚晴西門外廣佑寺白塔夕陽西下掩映照人五曰古柏琴聲西門外西會寺舊有古松老幹中空寄生柏樹一株每遇微風松柏相激其聲如琴六曰首山樵唱昔有仙人樵於首山夜聞歌聲曲終不見七曰寶山靈石南門外有石阜一處相傳每遇風起其石自能卓立八曰玉洞懸珠城東三十里駱駝洞中有圓石虛懸若珠

奉天古蹟攷

五

奉天作新印刷局排印

孔有德墓在遼陽城東南十里花園村又尙可喜墓在海城東南十里親屯耿仲明墓在蓋平縣連陰峪今均存

海城縣卽古海州治遼志州本沃沮國地高麗爲沙卑城唐書貞觀十三年伐高麗自東萊渡海襲沙卑城其城四面懸絕唯西門可上卽此

仙鄉故縣在今海城縣西六十里遼置屬東京以仙人白仲理得名

渤海南京在今海城縣境按遼史海城渤海號南京南海府疊石爲城幅幘九里今廢

洗馬澗相傳唐尉遲恭洗馬於此卽今海城南八里河

搨戟泉相傳唐薛仁貴搨戟於此泉水湧出在海城西南二十五里

煉丹臺相傳仙人白仲理煉丹之所在海城西四台子

管公屯相傳管寧依公孫度時厲此在海城西北五十里新台子

蓋蘇屯爲唐高麗蓋蘇文所居在海城西北耿家莊

遼澤通志謂在海城其地未詳新唐書高麗傳李勣圍遼東城帝次遼澤詔瘞降將十露骸

蓋平縣卽古蓋州渤海置本安市縣地在今城東唐征高麗薛仁貴白衣登城卽此
高麗蓋牟城在今蓋平縣境唐征高麗李勣攻破蓋牟城卽此
元菟亭在蓋平縣漢王莽置年月無攷

青石關在蓋平城北十二里青石嶺上山勢綿亘鑿山通路迤南爲形勝險隘之處縣境出
入必由此路明時所設關上猶刻神宗年號

仙水橋在蓋平城南四十里俗名張果老橋石上有掌指及蹄跡狀今圯石址猶存

熊岳城在蓋平南五十里山水蒼秀有熊岳河龍潭瀑布及古洞煙樵諸勝迹并有溫泉水
清煖謂治病極効云

開原縣卽元之開原府又縣西舊有開原城謂建於金前今無攷

開原舊志稱爲扶餘國地按三國志扶餘去漢元菟北千里出名馬赤玉貂欵美珠今以道
里計扶餘去漢遼東郡尙一千四五百里今之開原去遼陽城僅二三百里而赤玉美珠
出今黑龍江境內卽扶餘當在黑龍江境又古黃龍府舊志亦列於開原謂屬扶餘或扶

奉天古蹟攷

六

奉天作新印刷局排印

餘地大自開原至吉林黑龍江皆爲扶餘歟

來賓關在開原城西四十里卽慶雲堡上有石坊題曰來賓明時設官軍戍守

花露臺有二一在開原縣南四十里一在縣南三十里相傳邑中有二姻家以華麗相尙各
築一臺以自矜按漢時遼東有華麗縣所謂花露臺疑卽其遺址露麗音相近遂致訛誤
而後益加增會遂不詳其本耳

鐵嶺縣爲古銀州本渤海寧州遼太祖以置銀冶更名銀州明爲鐵嶺衛地舊有廢鐵嶺衛
署今圯

看花樓在鐵嶺縣東門外明寧遠伯李成梁故園僅餘四壁一石額門上壁間橫尺許梅幹
儼然又李成梁墓在城東南居家樓翁仲石馬猶存

唐王營在鐵嶺帽峯山東南地平如掌相傳唐征高麗安營於此

昌圖縣本爲內蒙古科爾沁左翼後旗地去城三里山麓有杏林杏樹數百株每當暮春花
時爛漫如雪遊者如入桃花源云

法庫本明三萬衛地爲蒙古入邊要道俗稱八虎道八虎卽法庫之轉音也

長白縣在長白山之南設治於塔甸地有唐塔相傳唐伐高麗用兵於此

鳳凰城築於明成化十七年因朝鮮使臣還國道經鳳凰山下遇掠奏乞於舊路南別開一路以便往還遂築此城

連山關在鳳凰城西北以近連山故名明時設關爲朝鮮入貢往來之道今關廢

輯安縣爲高句驪丸都地今通溝口有高麗王墓碑世謂之好大王碑已殘缺二百餘字相傳因求拓者多縣吏厭其煩以火焚之遂至殘缺云

金化成縣卽今金州縣治隋唐之征高麗兵糧戰艦均自此來南去百里有山曰鐵山昔常屯兵士七千人以防海路

金州爲明金州衛古亦稱南蘇州唐郭待封以舟師濟海伐高麗薛仁貴戰於金山大破之拔南蘇木底蒼岩三城皆在金州界內

旅順口舊爲旅順口關明時所設有城一統志云海運舟達金州衛者至此登岸

奉天古蹟攷

七

奉天作新印刷局排印

鴻臚井唐鴻臚卿崔忻所鑿在旅順口黃山之麓井上刻有勅持節宣勞靺鞨使鴻臚卿崔

忻鑿井兩口永爲記驗開元二年五月十八日造等字

旅順古井南近海井中有鐵索懸樹上不詳所始

旅順八景一曰黃金秋月卽黃山亦名黃金山二曰白玉夕曛白玉山有表忠塔三曰龍河

賞雨四曰虎尾歸帆龍河虎尾均在海口五曰靈峯朝雪謂爾靈山六曰鹽浦晚潮謂鹽

浦港七曰太陽鴈影太陽溝也八曰老鐵嵐光鐵鸞山也均爲日本大島都督所撰又大

連四景一曰星浦消夏二曰電園迎春三曰西山秋色四曰虎灘寒潮

錦州城卽明廣寧中左二屯衛城也遼置錦州金元因之明卽舊城修築形勢若盤俗謂之

盤城城東有大凌河城天聰五年明總兵祖大壽降於此

古大人城在錦州城內府治東相傳唐太宗征高麗時儲粟於此今圯

龍城在今錦州西十六國春秋慕容皝築龍城慕容熙復於龍城建甘露殿及景雲山逍遙

宮連房數百觀閣相交鑿渠引水爲曲光海清涼池今均無考

和龍宮在錦州西亦慕容皝所築皝作龍城時有二龍合在一山交首嬉翔皝見之大悅改所築宮曰和龍宮

白雀園亦在錦州慕容盛時有異雀素身綠首棲翔東園因改園名曰白雀以表其瑞花兒樓在錦州城東北四十里不詳所始

梳妝樓在錦州城西北三十里丫八石山相傳爲遼蕭太后建

錦西爲遼安昌故縣城基猶存東有塔下有金大定碑

興城縣原名寧遠州遼興城故縣卽在今縣南十五里海中桃花島上故址猶存

巨無霸塔在寧遠城西南六十里相傳長人巨無霸生此故名

北鎮縣原名廣寧縣今縣治爲遼顯州世宗置以奉顯陵故名顯陵今猶在醫巫閭山按遼

史世宗以人皇愛閭山水奇秀因葬焉曰顯陵又遼乾陵豫王墓平王墓均在閭山

唐壘在廣寧城東南三十里爲唐征高麗駐兵之所又誓台在城東三十里唐太宗征高麗築以誓師按唐書太宗大饗士幽州之南使長縣無忌誓師而廣寧乃營州也則誓師不

奉天古蹟攷

八

奉天作新印刷局排印

應在此

明遼王府在廣寧城內西北隅明洪武二十五年封遼王於此

覽秀亭在閭山西麓其地高爽可以登覽山河之秀故名

望海堂爲遼東丹王耶律倍所築倍好讀書購書數萬卷築堂閭山之頂額其堂曰望海遺

址尙存

義縣原名義州爲古宜州地遼改義州東丹王每秋畋於此

大棘城在義州城西北相傳爲顓頊之墟慕容廆曾都此今無攷

鮮卑故庭在義州境魏武帝征遼東涉其地

義州城南石人溝有常遇春墓按明紀常遇春葬鍾山之陰豈遇春卒於此先藁葬而後歸

柩土人猶本其始而目之歟

營口原爲鎮海營駐地舊稱東西營子距牛莊城九十里相傳昔有遊牧之人張幕而居狀

如軍營因名營子生聚日繁漸成村落咸豐十年天津條約始闢爲商埠

安東爲唐安東都護府地故名近築公園就元寶山點綴而成俯瞰鴨江仰眺鳳嶺樹木蔚秀形勝天然風景之佳爲奉省各屬所未有（以上古蹟名勝）

瀋陽近城無大山水天柱山舊稱東牟山以福陵得名隆業山築土爲陵本屬平地唯輝山在城東北四十里層巒疊嶂爲諸山之冠山出白土可以代灰俗亦名灰山

長白山在奉天之東綿亘千餘里東自寧古塔西至奉天諸山皆發脈於此山巔有潭曰天池爲鴨綠混同圖門三江之源古名不咸山亦曰太白山滿語曰果勒敏珊延阿林果勒敏長也珊延白也阿林山也

薩爾滸山在興京城西通志天命十一年太祖大破明兵於此滿語薩爾滸木廚也取林木叢茂之意

鐵背山在興京城西北一百二十里實錄天命四年太祖以兵五百人破明四路兵數十萬衆殲杜松於鐵背山卽此

千山在遼陽城西世傳唐征高麗駐蹕於此奇峯疊聳峭壁嵯峨周圍數百里風景殊佳有

奉天古蹟攷

九

奉天作新印刷局排印

五佛頂觀音洞羅漢洞振衣岡仙人臺梯子溝及香巖寺雙峯寺龍泉寺伴雲菴青雲觀諸勝跡借山勢幽深盜匪以此爲遁逃藪遊山之客爲之裹足

首山在遼陽城西南十五里一名手山山巔平石之上有掌指狀泉出其中取之不竭晉司馬懿征公孫淵於襄平有星墜於首山卽此

石城山在遼陽城東北上有古石城相傳卽高麗白崖城唐置巖州於此

唐紀功石在遼陽駐蹕山按新唐書高麗傳太宗破高麗圖破城狀勒石紀功

厝石山在海城城內山南有潭相傳龍潛其下雖風雨晦冥水中常有月形故龍潭夜月爲海城八景之一

平頂山在海城西南十里有積水四時不涸俗名浴盆山相傳唐太宗駐蹕於此故一名車駕山又曰望唐山

缸瓦嶺在海城東南三十五里出紅白土可燒琉璃瓦昔設琉璃窰於此
姑嫂石在海城東南相傳有姑嫂二女登石仙去故名

千山東麓俗名湯崗子在海城北四十五里有溫泉水湧如沸

伴仙山在蓋平城西南明天順中有道士號黃花老人居此數年乘鶴而去故名

聖井山在蓋平城西南上有石穴闊深尺許其水常滿汲之不竭

花兒山在蓋平城北三十里相傳上有樹一枝高丈餘遠近望之大小如一不知何名開小

白花其葉凌冬不凋犯之者輒病土人神之

鐵塔山在蓋平城東相傳有鐵塔飛去今以石爲之

謊糧堆在蓋平城西北相傳唐征高麗乏糧夜築土堆覆米其上以示敵

黃金山在金州西南原名金山唐薛仁貴救營州都督高侃戰於金山卽此

皮島在金州東一百三十里明總兵毛文龍招集遼人居此又雙島在金州西南明袁崇煥

殺毛文龍於雙島卽此

闔王鼻山在開原城東南斷崖陡絕清流下瀨中有紆徑可通車馬名以闔王鼻者極言其險也

奉天古蹟攷

十

奉天作新印刷局排印

黃龍崗在開原城北山勢芊綿委蛇起伏東連巨嶺西抵遼河儼如臥龍之狀崗上插柳爲

邊以限內外謂之新邊或謂卽古黃龍府地又稱黃龍塞

公主嶺在昌圖縣東相傳清初有公主下嫁蒙古搭拉汗道薨於此故名

龍洞在本溪湖東明山神工鬼斧巧似天成相傳昔有雌雄二白龍棲息於此

鳳凰山在今鳳城縣東南五里有壘石古城可容十萬衆舊志謂唐太宗征高麗駐蹕之

所又相傳薛仁貴與其大將溫沙門戰熊山擒善射者於石城卽此

摩天嶺在鳳凰城西北又呼高嶺俗傳唐薛仁貴破高麗兵於此

牛頭崖在鳳凰城西北二百八十里出香煤產青石可爲碑

青雲山在鳳凰城西北二百九十里亦名平頂山其頂平敞可畊稼有泉湧出以石八角登之中有魚

鳳凰城西北有溫泉在狗兒嶺俗呼狗兒湯云浴之能除疾

紫荊山在錦州城東二十里尊嚴高大爲郡之主山以產紫荊得名

白雲山在錦州城東二十五里上有聚仙寺左井右泉土人以雲氣候陰晴頗驗

臥佛山在錦州城西四十里山有臥佛寺供石臥佛像長一丈四尺女兒河水北流遶之又

呼龜山

十三山在錦州城東七十里峯有十三故名山上有澤其下有金牛洞峰巒羅列大小相錯

出山海關卽望見之凝嵐積翠於大荒中若遠若近宛如圖畫亦海山一奇觀也

大小虹螺山在錦州城西六十五里金置虹螺寨舊址猶存今山上有范文程墓

杏山在錦州城西南三十里松山在城南十八里呂翁山在城南十里按通志崇德七年破

明兵生擒洪承疇於此

牛心山在錦州城北有巖靜寺前後滿植桃花花時爛熳遊者甚衆

二郎洞山在錦州城北十五里山上最高處有望海觀音閣東見十三山西見葫蘆島南見

大小筆架山下則錦水凌川旋其左右

丫八角山在錦州城北三十里高峯插雲峯後有澗深不可測東有石佛二尊山上有石柱

奉天古蹟攷

十一

奉天作新印刷局排印

九相傳爲蕭太后梳妝樓故址

乳峯山在錦州城東南中峯如蓋懸崖有竇深約丈許泉溜如乳味甘冽可飲

大小筆架山在錦州城西南六十里俱峙海中狀如筆架潮至時四面皆水潮退有石如橋

長數里可通車馬稱曰天橋山爲昔人避兵處上有朝陽寺多颶風屋瓦輒飄去今存空

堵

塔山在錦州西南六十里舊有城明置塔山千戶於此崇德七年太宗平錦州後移師杏山

以砲攻塔山與杏山城垣同毀平之山頂有塔高七丈餘建於唐時

觀音洞在錦州城北十五里東西有二洞西洞甚高廣內建大士閣東北巖下有龍湫四時

不涸

壺蘆島在今錦西縣南濱海島名始見全遼志明鹿繼善參孫承宗軍巡視邊海嘗至是島

島長六里南廣而北銳中腰稍狹有若葫蘆然今方關商埠卽連山灣也

三首山在寧遠城東五里三峯相倚狀若人首其上有泉下注東南流八里入海

石梯山在寧遠城西昔人鑿石爲梯以便登陟故名

將軍石山在寧遠城西高數百丈一石如柱亭亭孤立高五十丈前有碑鐫鎮遼將軍字亦名天柱

望夫山在寧遠城西南一百八十八里相傳爲秦姜女望夫處

桃花島在寧遠城南十五里海中明時登萊海運泊船於此

覺華島亦名菊花島在寧遠城南十二里海中天命十一年焚明兵船及糧草於此島上有遠年廢壘土名新城子亦名高麗城子相傳爲唐時禦高麗所築

醫巫閭山在廣寧城西十五里高十餘里周圍二百四十里虞舜封十二山以此山爲幽州之鎮周禮職方氏東北曰幽州其山鎮曰醫巫閭隋開皇十四年詔以醫巫閭爲北鎮其山掩抱六重亦名六山山下爲北鎮廟廟東有仙人巖孤石峭拔上鑿呂仙像又名呂公巖廟西有卒雲屏一石方廣丈餘下有竇南北相通明巡撫張學顏刻補天石三字於上又有桃花洞飛瀑巖懸泉下瀉雖冬不冰其麓屹立兩石如門烟霧出壑縈繞重巒其山

奉天古蹟攷

十二

奉天作新印刷局排印

形勢恢特宵奧雄峙遼河之右名勝不可殫述

狼虎山在廣寧城東北二十里遼時遼州治平軍有狼山卽此

萬紫山在廣寧城內西北隅卽明時遼王府基或云萬翠山亦云萬字山

聖水在義州城東南山半有聖水寺寺旁有水滴巖下石坎中不乾不溢故名

寶林山在義州城東南六十八里上有寶林寺寺前有井相傳爲唐太宗征遼遺迹

牽馬嶺在義州城東南五十五里山勢極險中通驛路過者必下馬牽援乃可上故名

遼河源出熱河圍場中之海刺哈山東麓東流會老哈河迤東入蒙古科爾沁過遼源縣又

東南與赫爾蘇河合處土名三江口南流至通江子又南迤東入柳條邊經鐵嶺縣折

而西南流過新民縣東瀋陽縣西又西南至海城縣西北之三岔口渾河挾太子河經遼

陽縣北來會復西南流經牛莊城之西過田莊台折東南流於營口入海此河左右卽遼

東遼西所由分也

渾河在瀋陽城南十里一名小遼河爲遼河最大之支流按實錄太祖征瀋陽梯盾營柵之

具悉載以舟順渾河而下水陸並進拔瀋陽城

萬泉河一名小瀋水俗稱小河沿在瀋陽城南五里自東關觀音閣東泉眼發源南入渾河
泉水清冽遠近皆取汲於此

太子河卽古之大梁水在遼陽城北十五里源出吉林薩穆禪山入邊西南流合渾河又西
入遼河相傳燕太子丹匿衍於此故名

蓮花泊在海城西南相傳水中自生蓮藕故名

清河在蓋平城南二里源發哈達山河內出秋生子魚甚美

大清河在開原城東三十里南流至縣東南與小清河會合流入遼河每值春秋二季鷺雁
紛集遊獵者羣稱其地爲獵河

噶桑阿河在開原城東南滿語噶桑阿哀怨也不知何所取意

柳河在今新民縣源出敖漢旗經彰武縣入邊挾沙而行屢爲水患辛亥余守新民曾采衆
議植柳培堤藉防河害父老至傳爲金公堤余聞而亟阻之

奉天古蹟攷

十三

奉天作新印刷局排印

小凌河又名錦川在錦州城東十五里大凌河在城東四十里均清初用武之地兩岸設牧

州今墾爲熟田又東南有枯凌河卽大凌河故道分流入海旱則水乾故名

女兒河在錦州城西十八里相傳昔有仙女浣紗於河卽之不見故名

寧遠城東有溫泉其泉如沸明都指揮韓斌構亭其上旁爲堂引水於中以爲澡雪之所又
城西有香水泉清冽甘香

聖井在寧遠城西南鶴山下其井澗每遇歲旱鄉人禱雨納瓶取水傾之視瓶水多寡而雨
隨之其應如響

龍潭在醫巫闔山之麓周圍三丈許上有石如蓬覆之

廣寧城東北隅有古老無名泉四時不竭西北三里有滿井水味甘美雖旱不竭又城內有
清泉廉泉(以上山水)

實勝寺在承德縣外攘門關外俗呼黃寺中藏清太祖御用甲冑弓矢并供奉邁達里佛歲
首祭典俗有跳塔之戲寺內有瑪哈噶喇樓天聰九年元裔察哈爾林丹汗之母以白駝

載瑪哈噶喇金佛並金字喇嘛經及傳國璽至此駝臥不起遂建此樓

四塔在承德縣四城關外東塔永光寺西塔延壽寺南塔廣慈寺北塔法輪寺俱清初勅建用喇嘛相寺法每寺建白塔一座謂當一統云

天齊廟在承德縣內治門外每歲三月二十八日爲廟會之期百戲雜陳遊者甚衆

崇壽寺在承德縣地載門外唐時建內有塔一座明神宗時重修碑稱此塔創於有唐爲尉遲恭監造按遼東西浮屠多言尉遲恭監造大抵皆里人增會之辭

八王寺在承德縣地載門關有井水極清冽品泉者羣稱八王寺水不啻如北方之重玉泉江南之重虎跑云

西會寺在遼陽西門外里許相傳爲唐時建附近有關帝廟建於元至元乙酉年碑記尙存廣祐寺在遼陽西門外三里有白塔俗呼白塔寺明神宗六年修碑記謂寺創於漢時唐重修蓋遼郡古刹也內有自來佛一尊相傳前代有一鄉民貿易廣寧路遇一童子曰我往廣祐寺能負我往以銀布相酬其人諾之數百里不終朝而至抵寺則一金身佛像也數

奉天古蹟攷

十四

奉天作新印刷局排印

人輿之不動寺人異之酬以銀布而供於寺寺周可二三里門對千山亦州之勝也

香巖寺在遼陽千山明正德年修有碑記其最高處爲仙人臺相傳爲仙人對弈之所登者俯瞰滄海如在几席之下寺內有雪菴塔相傳元僧雪菴歿葬舍利於此塔若二石門相合內注水四時不竭旁一孔可入手探得圓石然不能出也

圓通寺在鐵嶺城內西北隅明天順年建有碑記浮屠高十三級相傳見老鸛棲止其上則有科甲之應

花雲祠在復州城東攷明時花雲子爲復州衛僉事於本衛建祠舊志孝義中載花雲其實雲生於懷遠死節於太平與遼東無涉

觀音閣在今鳳城縣鳳凰山明神宗年建閣後有山洞一梯升可以窺天一線俗稱觀音洞大廣濟寺在錦州城內北街西隅相傳肇建於唐時寺內有白塔高十三層遼道宗清寧間造藏皇后所降之舍利也金中靖大夫高漣有塔記明嘉靖年重修宣大巡撫文貴有碑

記

大寺在錦州城內有塔曰錦州塔於唐時塔座八間每面約六丈共四十餘丈塔十六層約高一百餘丈梁戊申出關錦州塔有句云夕陽孤塔影秋月故鄉情

普陀寺在錦州城西四十里北山上有洞洞中有泉石佛百餘正統中鎮守太監王彥等木鏤千手千眼大十像十範羅漢及諸菩薩楹閣參差河流縈繞因擬落伽之勝名曰普陀或稱觀音洞郡人古都御史文有記

大望海寺在錦州城南十九里松山南古刹也明景泰中寺僧掘井得元至正年銅鐘後掘地又得唐太和四年勅賜松山法華禪寺鈸磬等十餘事蓋唐時爲法華寺後更望海也弘治中有重修碑記

姜女祠在中前所城西二十五里望天山秦貞婦許氏孟姜祠也內有宋文天祥聯句云秦皇安在哉萬里長城築怨姜女未亡也千秋片石銘貞祠前有石曰望夫石或云卽姜女墓

北鎮廟在廣寧城西建最古中有牌曰北鎮醫巫閭山之神不供佛像

奉天古蹟攷

十五

奉天作新印刷局排印

清安寺在廣寧醫巫閭山中唐宋以來勒石舊蹟多有可觀者

雙泉寺在廣寧城西十二里寺南有石洞寺門內又有一小石洞竇通寺後一泉甚

靈壽寺在廣寧城西三十六里殿宇今圯山上有將軍拜母石俗因名將軍拜母靈壽寺

青巖寺在廣寧城西南五十里寺旁峭壁插天壁中有洞可容數十人洞外松樹盤如

華蓋洞東西各一泉山頂一泉洞上有虛無真境四字每遇晴明海洋在目遼陽千山歷

歷可數亦一鉅觀也

奉國寺在義州城東北隅一名七佛寺創於遼開泰中元布延公主施元寶千錠重修蒙古語布延福也

萬佛堂在義州城西十五里前有山俯瞰大凌河南崖刻石佛像大小無數(以上祠祀)

關外風俗較關內爲淳樸通志稱舊俗性樸實氣剛健習禮樂尙詩書士習醇良民風樸茂近都邑者尤見衣冠文物之盛今則五方雜處末俗所染雖樸厚漸不如昔而謹身率教守法奉公總非內地澆薄之俗所可比也

通志載舊俗喜起舞宴樂每用之謂之瑪克紳與泰西跳舞之俗正復相似今已不行
大金國志金人舊俗多指腹爲婚姻既長雖貴賤殊隔亦不可渝今東省猶有早婚之弊每
有男逾十齡而已娶女方垂髻而爲人母者誠陋俗也

東省土厚宜五穀物產以大豆及蜀黍爲最大豆古謂之菽運銷出口蜀黍今呼高粱土人
率多以此爲飯又通志稻有紅白二種出遼陽者色微青味尤香美號遼陽青

通志土著知蠶桑作棉布按後燕錄遼地無桑慕容廆通於晉求種江南始得之又順治元
年盛京地方留養蠶屯十餘處已無可攷今錦西遼陽等處多種棉金復海蓋及鳳城一
帶多山蠶一名樗繭放之樗柞等樹春秋收繭練絲爲紬其品亞於山東又晉書肅慎績
毛以爲布今不多見

北史勿吉傳水氣鹽生鹽於木皮之上新唐書黑水靺鞨傳有鹽泉水氣蒸薄鹽凝樹巔今
不聞有木鹽可食或昔有凝於樹上之鹽亦須煎煉乃成耳

明一統志海州衛出茶今海城諸山中亦有產土茶者土人採以爲茶特味較南茶爲薄

奉天古蹟攷

十六

奉天作新印刷局排印

諺云關東三寶人參鹿茸烏拉草按人參產於東山初夏得者曰芽參花時得者曰朶子參
霜後得者曰黃草參以老山歲久而形似人者爲佳鹿茸乃角之初生者連額削落事最
慘酷而方書言其補陰人皆樂用之烏拉草性煖編鞋可以避嚴寒冰天雪地非此不足
以禦之三者之中此爲眞寶

蘑菇諸山皆有之大而黃者佳種類不一生於榆者爲榆蘑生於榛者爲榛蘑又有榆肉生
於榆樹窟中味尤美

羊草生山原間昔戶部官莊以時收交備飼牛羊之用西北邊謂之羊鬚草長尺許莖末圓
勁如松針黝色油潤飼馬肥澤大宛苜蓿疑卽此今人以苜蓿爲菜蓋名同也

榆樹類甚多皆美材刺榆花榆尤佳刺榆大者中爲車軸一名軸榆唐風所謂山有樞者此
也花榆理細宜爲几案凡榆腫處花紋尤勝可飾器用人多珍之

樺木花紋極細尤勝於榆有天然成山水人物形者飾爲屏案頗有足觀作杯碗亦佳蒙古
人祭器均用之皮似山桃有花紋紫黑色可裹弓把及鞍鞆諸物黑龍江有樺皮船僅受

一二人携以入水遊行便捷

煖木明一統志謂海州衛出或云卽棄藥木皮溫厚可墊韃心包弓把細者中爲鞭桿又薩哈連烏拉出小煖木形類杉松木質尤堅入水年久化爲安石可充砥礪之用

東爪木出遼陽似柘柳皮色青亦名水柘柳質堅中爲硯材通志按本地石可爲硯者出平頂山及駱駝洞然質滑瓦可爲硯者出北鎮廟然性堅難磨得遼陽東上石橋金星礪石方可成器木可爲硯者卽遼陽東爪木也質輕易携頗能下墨雖非奇玩亦自可珍

亮木爲古木根莖所化夜視有光遇雨益明移置屋中卽可燭物山中往往有之見通志其理似不可通

通志今英莪門外獵場中有芍藥兩叢相對繁柯密葉鬱然猶存其下不生雜草土人云凡鳥獸避迹不敢蹂踐花時人過之畏不採擷或有所犯必致疾病因名其地爲花園此則理不可信特不知其花今尙在否耳

菊花種類甚繁東省地寒諸花皆後時五月始茁枝八月被霜卽凋謝唯菊開應節秋後移

奉天古蹟攷

十七

奉天作新印刷局排印

盆入室臨南窗下可以耐久又高麗菊產朝鮮花類萬年菊單瓣色黃赤相間如虎皮

松子諸山中最多率三歲之中一歲大收興京松子官山松子大如棗舊充貢品又榛子香

美甲於他省經荒火燒落者尤佳

香水梨爲奉天特產以出遼陽千山者爲上或鮮或凍或蜜餞以時入貢又有製成梨乾者尤可致遠

溫普形似滷味甘而酢又法佛哈一名紅櫻卽白櫻果又有名伊爾哈穆昆者俗呼高麗果色紅赤如豆味甘而酸入口成液置器中少刻化爲水故一名桃花水

塔糖東省歲暮祭灶神用相傳唯遼陽某處井水煎製者爲最佳今此井已劃歸車站界內不能任便取水故塔糖之製遂絕

樹鷄生長林中似雉而小脚有毛亦呼爲沙鷄

鷓出奉天以東諸山中其品不一上等色黑者曰皂鷓有花紋者曰虎斑鷓黑白相間者曰接白鷓小而花者曰芝蔴鷓昔內務府有鷓丁取以充貢又鷓之大者能捕麋鹿又海東

青亦曰海青爲鵬之最俊者身小而捷能擒天鵝爪白者曰玉爪駿尤俊異絕倫一飛千里遼時以海青鷗擊天鵝首得者薦之宗廟

千里紅頂有紅毛喜食蘇子俗呼蘇雀出俄羅斯地雪後卽來羣飛入海以十一月囚而取之炙食甚美

新唐書渤海傳俗所貴者率賓之馬按率賓卽今奉天東南之地與高麗僅隔一江而內地馬大高麗馬小可知物產亦限疆域也

東省犬極健通志稱有力能制虎者最爲難得又外蕃犬可供驅策故元史有犬站以犬代馬今黑龍江北費雅哈部落尙役犬以供負載

東邊諸山多熊俗稱黑瞎子睫毛長而掩目不易視人獵者橫出其鎗擊之中喉卽斃唯性極凶猛常出害人

堪撻漢一名駝鹿頸短形似鹿色蒼黃無斑項下有肉囊如繁纓大者至千餘觔角扁而闊瑩潔如玉中有黑理截之鏤爲決勝象骨直數萬錢

奉天古蹟攷

十八

奉天作新印刷局排印

狼皮以毛青白者爲貴按會典品官坐褥冬用皮有定制一品用狼二品用獾三品用貉四

品山羊五品以下用白羊皮公侯極品用虎豹皮

貂鼠產東山者色黃邊外色紫黑皮甚輕煖以松子爲糧打牲者八月往十二月回皆於雪天尋其跡而捕之

魚各種皆有以松花江白魚爲最肥美又細鱗魚圓身細鱗多出山流狹處倒鱗魚唯龍潭山頂有之鱗皆倒生相傳以爲龍種通睛魚兩目通明絕可異舊例歲貢四尾

東珠生於蚌蛤大可半寸小亦如菽每八月望月色如晝則珠必大熟入冬方採取而北方返寒九月十月堅冰厚已盈尺探者鑿冰沒水而捕之

松花玉色淨綠光潤細賦品埒端欵可充硯材又浮金石亦可爲硯又錦州石質似瑪瑙作烟嘴鎮紙等物殊可觀(以上風俗物產)

通志人物門首列漢王閔諸人按錦州爲古孤竹國地昔傳有夷齊墓伯夷叔齊不食周粟餓死首陽稱爲萬世一人通志不知引之何其無識又舊志曾列箕子新志亦刪之

舊志於漢名宦首列荀彘楊僕以其有定遼之功也攷史記朝鮮傳燕人衛滿據朝鮮爲亂遣楊僕荀彘會討彘疑僕有反計執捕之并其軍急擊朝鮮降之彘還坐與僕爭功棄市據此則僕初無定遼之功彘雖定遼而以爭功見誅亦不掩其罪且僕本酷吏史氏黜之與張湯同傳其人皆不足以冠名宦新志改列漢甘延壽范明友庶於循名責實或有當焉

舊志名宦多引度遼將軍按度遼將軍始置於漢屯五原曼柏在今榆林北邊境去遼東絕遠則所謂度遼者遼訓遠意當謂度絕遠以征伐也攷後漢李膺張奐皇甫規諸人皆拜度遼將軍而實未蒞遼東之地又隋唐時從征高麗諸將非宦於遼東者有名蹟者比舊志錄爲名宦亦殊失之冗濫

通志文學首列北魏屈遵按遼瀋山川雄秀文學始於漢王景班史稱之及遼祖起松漠輦致晉圖書景聖之間文風蔚起則文學一門仍應以王景爲首攷後漢書王景字仲通少學易廣關衆書又好天文術數以六經所載皆有卜筮而衆書錯糅吉凶相反乃參紀衆

奉天古蹟攷

十九

奉天作新印刷局排印

家言集爲大衍元基云

遼瀋多名山大川古隱逸之士恒韜跡於此漢李敏晉公孫永爲尤著敏永均襄平人今李氏猶爲遼西大族云

史稱東漢管寧與邴原王烈避地遼東至今傳爲美談而攷諸志乘則西漢王仲逢萌實爲稱首故通志流厲首王逢二人按王仲瑯瑯不其人諸呂作亂仲懼禍及浮海東奔樂浪山因家焉景其八世孫也

隋虞綽銘遼比之蓬瀛仙都明文貴亦稱招提勝境以故前代頗傳有仙釋之蹟志傳丁令威其尤著按後漢丁令威遼東人學道於太平府靈波山後化鶴來集於遼陽華表柱歌曰有鳥有鳥丁令威去家千載今來歸城郭猶是人民非何不學仙塚壘壘(以上人物)

滿洲字創於達海清太祖授意爲之按百濟新羅渤海沿用漢字金初尙用契丹字至金太祖始製女真字熙宗又製女真小字用以譯經史試科舉迨蒙古字行而女真字中輟明秘閣書目尙載有女真字母一書今已不傳余曾見舊拓女真字殘碑字形較滿蒙文爲

簡惜不能譯其意又見蒙古舊契一則書字於白羊皮上皮煉製甚精雖歷年已久而不見殘損當是元以前物云

薩滿教相傳爲滿洲舊教敬巫祀天其儀式以跳神爲重今已不行按薩滿實非宗教傳聞舊供神牌所書爲法祖敬天等字蓋滿洲夙重祭天之禮九重敬祖以不忘本爲教攷北盟錄薩滿者女巫也尤足爲非教名之證

森林滿語謂之窩集東省多大窩集廣者至數千里小亦數百里林木叢茂排列成行雖屬天成頗似人造說者謂非人力不能有此想千百年前必有偉人出於其間借天然之力加以人工故至今猶見經營之迹

奉省東北一帶荒山曠野常見廢城遺址規模甚大足徵昔日城市之盛按遼金都城其初均在今吉林黑龍江境內奉天居其南地近關內不應比之蕭索當是屢經戰事人民逐漸播遷遂致地廣人稀曠野千里如今日云

遼東西名城要隘大抵爲古戰場自清師入關三百年未遇大亂而三十年來甲午中日之

戰庚子拳匪之亂甲辰日俄之戰迭遭兵燹戰事遺迹觸目皆是如瀋陽之魚鱗堡遼陽之首山堡安東之元寶山等處均爲日俄戰場瀋遼車站并有日人所立表忠塔而旅順大連金州一帶戰跡尤多余壬子春遊旅順有句云海色蒼茫落日黃潮聲嗚咽泣殘陽春風猶是帶秋氣大好河山作戰場

盛京通志有二本一刊於乾隆元年有坊刻本一刊於乾隆四十八年因舊志敘事簡畧體例亦多未合奉旨派員重行編纂交武英殿校刻較前編約增三分之一唯殿本不易得乙卯張貞午使君按奉特翻印之又徐菊人師督東曾聘吳襄之廷燮編奉天通志稿存公署久而散佚梁近方覓人重錄俟繕齊後當謀集資刊行焉(以上雜誌)

